

四庫全書

集部

欽定四庫全書

集部

慶湖遺老詩集卷二

詳校官庶吉士臣陳若霖

侍讀臣孫球覆勘

覆校官中書臣宋枋遠

校對官中書臣王鍾泰

謄錄舉人臣劉禮

欽定四庫全書

集部三

慶湖遺老集

別集類二 宗

提要

臣等謹案慶湖遺老集九卷宋賀鑄撰鑄字方回衛州人唐諫議大夫知章之後元宗時知章致政詔賜鏡湖據謝承會稽先賢傳謂慶湖以王子慶忌得名後訛為鏡故鑄自號慶湖遺老初以婚于宗女授右班殿直元祐

中李清臣奏換通直郎通判泗州太平州卒
事蹟載宋史文苑傳其詩自元祐己卯以前
凡九卷自製序文是為前集己卯以後者為
後集合前後集二十卷同時程俱為之叙今
後集已佚惟前集僅存鑄子櫟跋稱後集經
兵火散失則南宋已無完本故書錄解題所
載卷數與今本同也方回作瀛奎律髓稱鑄
每詩題下必詳注作詩年月與其人之里居

姓氏今觀此本與回所說相符蓋猶舊刻之
未經刪竄者矣鑄以填詞名家世傳其青玉
案詞梅子黃時雨句有賀梅子之稱然其詩
亦工緻修潔時有逸氣格雖不高而無宋人
悍獷之習苕溪漁隱叢話稱其以望夫石詩
得名詩人王屑稱王安石賞其定林寺絕句
王真方詩話載回論詩之言曰平淡不涉于
流俗奇古不鄰于怪僻題詠不窘于物義叙

事不病于聲律比興深者通物理用事工者如已出格見于成篇渾然不可鑄氣出于言

外浩然不可屈

案此段以叶韻成文

觀其所作雖不盡

如其所論要亦不甚愧其言也陸游老學菴筆記曰賀方回狀貌奇醜俗謂之賀鬼頭喜校書朱黃未嘗去手詩文皆高不獨工長短句也今其文則不可睹矣乾隆四十五年五月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

集部三

慶湖遺老詩集目錄

別集類二 宋

卷一

歌行

卷二

古體上

卷三

古體中

卷四

古體下

卷五

近體五言

卷六

近體詩長句上

卷七

近體詩長句下

卷八

五言絕句

六言絕句

卷九

七言絕句

拾遺

補遺

附錄

慶湖遺老詩集原序

慶湖遺老者越人賀鑄方回也賀本慶氏后稷之裔太伯始居吳至王僚遇公子光之禍王子慶忌挺身奔衛妻子迸度淞水隱會稽上越人哀之予湖澤之田俾擅其利表其族曰慶氏名其田曰慶湖今為鏡湖傳謠也漢孝安帝時避帝本生諱改賀氏水亦號賀家湖焉家牒載謝承會稽先賢傳叙畧如此唐代既頒勲格百家圖譜併為煨燼元和中林寶集著姓纂臆謂賀氏慶封

之後非是按封劫專齊政田氏患之聚三族甲環其宮而夷其族封僅身免走魯遷吳卒被屠戮安有遺種哉吾家特會稽一族他州之賀蓋賀蘭賀若賀跋賀婁賀魯賀葛賀賴賀述賀兒賀略孤吐賀諸姓省焉鑄十五代祖迺祕書外監之後祖弟諱知止少味老易躬耕不仕開元末興崇玄學本道三以道舉薦送不赴會有聞于朝者起家拜上虞丞秩滿試任城令時李翰林白寓游是邑與公相從於詩酒間謨其美政書公堂之壁後

人鏡詩石今或存焉久之遷陽穀令卒官民懷其惠遮
留喪車不得時發因權寔縣之北原三孤即壠為廬免
喪按安史之亂縣又改隸東平尋為李正己巢據之寢
用非法游民浮房禁不聽還伯仲定居陽穀俾李陰歸
會稽以持先業皆力田自潔不復為仕宦計季實吾祖
也歲一北走省展存歿且自誓約生雖居死當祔骨先
壟之次逮七世孫遵約不墜後屬董昌盜越民罹其毒
因棄業北遷合族焉國朝緣外戚賜第開封隆和里六

代祖廣平王始別墓于浚儀固子陂之原高門平州府
君受命北征即誥其家嗣曰吾家本慶氏昔王子嘗寓
於衛而子必以舊氏名之吾死必封樹衛郊示不忘本
府君竟死事朔野曾門以哀毀廢于家但名其子而重
誥之天聖初大門總北道坳牧之正遂卜府君之新阡
于衛屬邑共城東原仍徙貫焉行先志也鑄少有狂疾
且慕外監之為人顧遷北已久嘗以北宗狂客自況今
寢老且疾念歸何時而亟更舊稱者亦首丘之義耳鑄

生于皇祐壬辰始七齡蒙先子專授五七言聲律日以
章句自課迄元祐戊辰中間蓋半甲子凡著之藁者何
啻五六十篇前此率三數年一閱故藁為妄作也即投
諸煬竈灰滅後已者屢矣年髮過壯志氣日衰落吟諷
雖夙所嗜亦頗厭調聲儷句之煩計後日所賦益寡而
未必工於前念前日之燬燼為妄棄也始哀拾其餘而
繕寫之後八年僅得成集以雜言轉韻不拘古律者為
歌行第一卷以聲義近古五字結句者為古體詩第二

第三第四卷以聲從唐律五字結句者為近體五言第五卷以聲從唐律七字結句者為近體長句第六第七卷以不拘古律五字二韻者為五言絕句第八卷以聲從唐律七字二韻者為七言絕句第九卷隨篇叙其歲月與所賦之地者異時開卷回想陳迹喟然而歎莞爾而笑猶足以起予狂也倘夢境幻身未遽壞滅嗣有所賦斷斷自己卯歲列為後集云丙子十月庚戌江夏寶泉監阿堵齋序

鑑湖遺老詩序

鑑湖遺老詩凡四百七十二篇其五字八句詩鍛煉出入古今為集中第一其餘大抵名家作也予少讀唐實錄與會稽石刻見賀季真棄官本末方開元天寶之間天下號無事文學士見貴重季真出入禁省冠道士使入儲副極當世華寵然一旦不顧去為千秋觀道士使人視之超然如雲漢登秦望行剡川未嘗不悠然遐想也季真去後四百二十載建中辛巳歲始其孫方回江湖

上蓋鑑湖遺老也方回落落有才具觀其詩可以知其
人中間累官錢塘及通守兩郡輒謝病去為祠岳吏又
一旦挂衣冠客吳下窮達雖不同其勇退樂閒故有鑑
湖餘味然予謂方回之為人蓋有不可解者方回少時
俠氣蓋一座馳馬走狗飲酒如長鯨然遇空無有時俛
首北窗下作牛毛小楷雌黃不去手反如寒苦書生方
回儀觀甚偉如羽人劍客然戲為長短句皆雍容好麗
極幽閒思怨之情方回忼慨多感激其理財治劇之方

疊疊有緒似非無意于世者然遇軒裳角逐之會常如
怯夫處女予以謂不可解者此也予竒窮骯髒可憎方
回多交游乃獨以集副授予曰子好直美惡無溢言為
我詳而叙之此亦豈其不可解之一端耶政和三年癸
巳歲十月朔信安程俱叙

--	--	--	--	--	--	--	--

欽定四庫全書

慶湖遺老詩集卷一

宋 賀鑄 撰

歌行三十九首

叢臺歌

按邯鄲縣譜叢臺趙武靈王築起地

三百尺今故址猶十仞在縣中東北隅元豐

辛酉七月同邑令濮人杜儼仲觀登杜先有

此詩要予同賦

累土三百尺流火二十年人生物數不相待摧頽故址

秋風前武靈舊壠今安在
禿樹無陰困樵采玉簫金鏡
未銷沉幾見耕夫到城賣
君不見叢臺全盛時綺羅成
市游春暉一從凋輦閉荒草
蕭散行雲無復歸招魂想
像風流在晴華露蔓猶依稀
盤紆棘逕撩人衣禾黍晚
成貂貉肥層簷碧瓦碎平地
夢作鴛鴦相伴飛登臨弔
古將語誰城郭人民今是非
指君看取故時物南有清
流西翠微彷徨華表不忍去
豈獨遼東丁令威

黃樓歌

熙寧丁巳河決白馬東注齊宋之野

彭城南控呂梁水匯城下深二丈七尺太守
眉山蘇公軾先詔調禁旅發公廩完城堞具
舟楫拯溺療飢民不告病增築子城之東門
樓冠其上名之曰黃取土勝水之義樓成水
退因合讌以落坐客三十人皆文武知名士
明年春蘓公移守吳興是冬謫居黃岡後五
年轉徙汝海予因賦此以道徐人之思甲子
仲冬彭城作

君不見熙寧丁巳秋靈平未塞河橫流澶漫勢欲浮東
州斯人坐有為魚憂當時賢守維蘓侯厭術不取三犀
牛跨城岌崑起黃樓五行相推土勝水鼉作黿驚走鞭
箠三丈橫流變清泚南來船車鷁銜尾使君登覽興如
何舞劍吟箋賓從多水平照影見雁下山空答響聞漁
歌樓下汀洲長芳草一麾南出彭城道昨日春游咏白
蘋後夜秋風悲服鳥黃岡汝海心悠哉青山白髮多塵
埃采菱伎女今何在騎竹兒童望不來望不來碧雲明

月長徘徊

彭城三詠

元豐甲子予與彭城張仲連謀父

東萊寇昌朝元弼彭城陳師中傳道臨城王
適子立宋城王和文舉采徐方陳迹分詠之
予得戲馬臺斬蛇澤歌風臺三題即賦焉戲
馬臺在郡城之南斬蛇澤在豐縣西二十里
歌風臺在沛縣郭中

秦蛇已中斷劉項方龍戰叱咤沮風雲睢盱走霆電鴻

溝一畫天地開楚王洗劍東歸來新都形勝控淮泗籠
山絡谷營高臺重瞳登覽何為者不知招賢知戲馬上
如激天下投丸蘭筋霜腕便回盤半夜悲歌雖不逝明
日陰陵行路難駉牝三千歸漢閑粟豆尤聞蠹縣官君
不見華山之陽古垌牧春風吹草年年綠

右戲馬臺歌

君不聞泗濱亭長送徒如咸陽徒夫懷歸多道亡澤中
置酒飲相訣吾亦從此奔芒碭陰風蕭蕭尊者懼前有

修蛇怒橫路酒酣拔劍留行劃斷蛇蛇不回顧河明
月出人踵來彼媼何冤號且哀謂遭赤帝屠吾子語竟
莫知安在哉真人聞此自心許茫茫四海吾其主虎變
龍飛十二年馘項梟英蓋狐鼠半夜雄鉞飛上天幾見
長陵一抔土

右斬蛇澤歌

漢祖高風百尺臺千年客土生蒿萊何窮人事水東去
如故地形山四來江淮猶沸鯨鯢血八十一車枉歸轍

白首逢迎皆故人
牢酒歡呼惜將別
峭渾迢迢非我鄉
死生此地何能忘
酒闌鳴筑動雲物
青衿兒曹隨抑揚
爾時可無股肱良
端思猛士守四方
君不聞淮陰就縛
何慨慷

平聲

解道烏盡良弓藏

右歌風臺詞

漁歌 甲子十二月張謀父陳傳道王子立會

于彭城東禪佛祠分漁樵農牧四題以代酒

令予賦漁歌

嚴公桐江上呂父清渭濱出處兩能事寥寥乎若人擁
蓑茆笠吳儂子身偶一竿生寄水侯庖富饌美鮓鱸寸
鬣分鱗辱刀几吾將一鉤縣十犍笑倚扶桑不計年鯢
鯨懷餌脫相得坐使東南飲食鮮

江南曲 乙丑三月彭城分題得江南曲

游倡寒杜若別浦鴛鴦落向晚鯉魚風客檣

闕

泊當

時桃葉是新聲千載長餘隔水情烏衣巷裡人誰在白
鷺洲邊草自生

三鳥詠

元祐戊辰三月之官歷陽石磧戌日

從事于田野間始聞提壺竹雞子規三鳥其聲殊感人因賦之以寄京東朋好

綠野帶江春漠漠露濕花萼朝暮薄年芳婉婉欲辭人
啼鳥殷勤勸行樂提壺真起予十千美酒當賸沽金龜
寶貂家所無持底可過黃公壚調官東來今幾日謂有
公田宜種秫朝廷未除私釀律安得一試焦革術提壺
鳥歎吾與爾皆悠悠君不見長安兩市多高樓大書酒

旂招貴游脫聞提壺鳴樹頭論槽買甕更獻醕庶幾此
聲知所投胡為南鄉長滯留端使北宗狂客羞

北宗狂
客方回

自號
也

右提壺引

東南澤國陂塘濶旱歲少逢晴五月田間鼃喜雨冥冥
竹下雞啼泥滑滑而予不耕陂下田田臯驅馬揮長鞭
稻塍微茫絕復連如躡鏡面流鮫涎植蹠沮如不敢前
何暇顧惜青連乾竹雞鳥汝幸飛翔羅爵外安知此途

吁可畏雄雌更鳴方自慰汝不能言臆為對君不見日
圍赫赫是長安大明宮闕開雲端雞人唱漏辰三刻左
右相君朝謁還前驕誰敢干後乘不可攀飄飄青蓋望
已遠綠堤陰下沙堤間長堤千步沙漫漫風不驚塵雨
亦乾君能馳騫此其所何事江鄉行路難

右竹雞詞

長江靡迤山坡陀旅竹荒松蒙薦蘿蚕初眠起風日暖
梅弄黃時烟雨多山間有逕行逶迤倦客據鞍生睡魔

奈爾思歸啼鳥何子規鳥不如歸去好誰家西北最高樓
幾為王孫怨芳草子規憐爾解歸飛我獨何心長不歸
十年迹絕蘇門道夢裏舊游知是非一官竊食官倉米
十口之家飽而已金印錦衣耀閭里少年此心今老矣
問舍求田從此始

右子規行

東華馬上懷寄清涼和公蕉簡社中王拙居士
東華在歷陽郡北八十里隔江與金陵相

直王字間叟已巳十月賦

雞鳴統五鼓驅馬東華路月落潮上時雲披日生處搖
搖漁艇子挂席凌江去送目思悠然橫樂聊一賦鴻雁
南飛江北流亭亭雙塔是昇州前朝物色今何見白鷺
平沙接石頭石頭城上清涼國中有彌天大比丘右軍
遠孫傲時者巾鉢久從蓮社游吾亦明年及瓜代一庵
見寄外何求

廣四愁寄李諫 李字智父時為白馬從事庚

午七月歷陽賦

夜如何其夜未央斗星燦兮河蒼涼微月入牖窺曲房
候蟲刺促鳴我牀離憂歛來煎人腸夜如何其夜何長
綠琴在薦兮擬楚奏之沈湘朱絃溼露兮聲戾指而不
揚屏琴浩歌兮屑涕泗之浪浪我有所思兮在河之陽
優而不見兮衷難弭忘駉驥騰躍兮鴻鵠翱翔明璫玉
案兮爾不我將緘誠結惠兮久莫汝償永如牛女兮南
北相望昔燕處兮靈芸之堂紉蘭為佩兮集芰為裳西

風淒緊兮凌百草以殞黃蘭
萎艾裂兮恐被服之不芳
念汝玉立兮賤組繡之文章
玄節日厲兮奈慘慄之冰
霜胡不乘白雲兮歸來乎
帝鄉尚何所俟兮畢永歲而
彷徨

舟次金陵懷寄歷陽王掾相
王字元胥庚午

十二月賦

昨時江北望江南把酒離愁已不堪
今夜江南望江北抵掌清談安可得
歷陽白下非吾鄉官身俗眼禁人狂

後日扁舟更西去江北江南兩何處

贈道士蹇拱辰

嘗觀妙手御風圖想像斯人世所無今識黃冠葆光子
爽氣飄飄盡不如岷峨東來九千里眼飽高山與流水
乘春更擬訪天台晨肇當年偶然耳葆光子胡為乎鼎
中龍虎煉成寶筆下鬼神驅作奴須君且置是等事三
復玄元皇帝書

艤舟秦淮雪中訪侍其瑀侍其字服之庚午

十二月賦

北風破雨初成雪
齋舫蓬牕吹紙裂
藍舁觸冷訪圓廬
得把一杯聊耳熱
人生自適待何時
矧君與我皆衰遲
會待晴天暖風日
杖藜同赴北山期

寄墨代書贈楊時 楊字中立彭城僚友也為

南康刑獄掾庚午十二月金陵偶便因以詩

墨寄之

徂來雪壓蒼松顛
淪膏根柢蟠蜿蜒
樵斤翦枿石火熱

曲突百步凝梢烟蒲萄秋顆累累縣海膠九煉堪續絃
力搗萬杵曰欲穿劑成圭璧隨方圓點漆比色石比堅
坐令李韋羞居前陳臺潘谷老且賢授唯識者不計錢
是翁解化如蛻蟬後可繼此無聞焉付君一圭歟識全
保護緊密何千年君家清風宜世傳不特談玄須草玄

留別僧訥 辛未正月金陵賦

冗從兩班誰比數牛僧馬醫猶爾汝詩解窮人未必工
苦調酸聲效梁父滎陽道人方外交謂我有言追屈騷

驪珠不惜彈黃雀狗尾何堪聯晉貂秦淮潮上扁舟發
後日相思一書札千里同風了了然人間無處無明月
留別道士許自然 自然山陽人喜談老易早
為荆國王公所知嘗被召對於延和殿賜號
葆光掌中太乙宮文籍未幾謝病來茆山辛
未正月相逢于金陵求予詩因賦此

東晉高賢許遠游裔孫今不墜風流還有臨川大太傅
每思與語即登樓浮名何啻如雲薄鐘鼓爰居非所樂

漱石枕流知善謔友月朋風差不惡吾亦塵間無所求
終期採藥棲羅浮異日歸來遼海鶴不見人民見城郭

贈趙參軍滂 趙字沛然工書得鍾王楷法辛

未二月高郵賦

髯參軍髯參軍平昔相好書相聞妙兼八法嗤五雲一
字僅課三年勤春回玉樹生蘭筋驕驕氣壓千羸羣庾
家之難安足云君子硯漁而筆耘桓扇兮羊羣奈何不
書藥珠祕錄之真文寶厨鈿軸絨靈芸閣居清絕無世

紛誰其觀者紫陽君後日人間偶流落猶得標題持鍵
鑰

留別田畫

田字承君始名至明字君義元豐

初滄陽同官也辛未二月邂逅于高郵因賦

此以贈別

君家陋巷一尺泥吾車有輪馬有蹄犯寒踏雨重相過
明日扁舟吾遂西回首邯鄲迹如掃離索十年成潦倒
兔葵燕麥春日妍蟬腹龜腸氣方飽雲達宵宵謝攀躋

長缺與人還故棲異時結駟來南畝耕者老夫鋤者妻
調北鄰劉生 辛未六月京師賦時將為衡陽
之行

荒園老墻百堵破北鄰劉子南鄰賀今兩相望不相過
端怯衡陽芒屨闕吾庖無魚未必餓晏飯糠覈煩脾磨

吾牀何容凡物坐書為睡媒即牀卧彼子劉子何所作
佐方學商聲哦楚些細君憂瑟與之和相忘之樂在江
湖最靈者人情不無此日可惜難再圖秋風西來莫挽

吾後日相思幾千里書不盡言徒耗紙

答靳生 生名馳嗜酒而狂自號為酒隱翁壬

申正月遣人持兩詩見投日索具報因賦此

軒軒陸士龍卓卓荀鳴鶴雲間日下逢此段殊不惡方
君嗜狂藥而吾窮病縛相望不相過賦詩聊爾謔知君
酒隱慕先賢誰何合閤作飲中仙金陵妙唱丹砂絃當
日新聲傳不傳莫學滄波弄雲月老鮫哆口饒流涎訪
吾之居在何許春明門東大道邊青鞵布鞵不妨步何

待東家蹇驢乃著鞭我屋真無坐客瓊蒲團檀机共蕭然鬪雞走狗春風顛付與垣東惡少年

亡女勝璋哀辭 適汶陽邾氏子彥修三年而

死甲戌三月海陵賦

百疴沉頓彌兩年何圖壯女死我先失聲忍號氣窒咽
淚如縷縻汲九泉嗚呼尚敢尤諸天託非其人死失所
父孱母嚚猶棄汝吞卒咀楚申何許萎蕤殞英春不主
嗚呼萬古為冤土

老鶴歎 海陵蘇氏即居之南鑿小池以畜雙

鶴甲戌夏旱池涸如陸是鶴饑立庭除間主

人莫恤也因賦詩以歎之

華表華表歸來乎出無車兮食無魚懿公之遇難再圖
卑棲俛啄同羣雛誰謂嵇氏子不孤強顏市井交屠沽
巨源密啓亦已踈嗚呼衛侯既不可作道林今也則無
露鳴風舞何區區夙夜供君耳目娛西山二子飢相似
南國三閭放不如端慮盤飧懷異味併隨焦尾付庖厨

送王安節赴武康尉 荆國公族弟也甲戌六

月海陵賦

江左風華推第一王氏堂堂文獻出烏衣諸郎能少屈
尚執中司三尺律君方色養白頭親吳興水陸饒甘新
卞山之下苔溪濱一洗長安肥馬塵君不見昔人負米
長勤捧檄喜敢論州縣徒勞耳

送海陵周太守邠受代還朝 周字開祖嘗宰

管城有聲甲戌六月賦

湯湯水東流奈何載此西行舟
統如五鼓鳴城頭使君去矣
不可留前日使君來天子惠
此州傳道管城政先聲走羣
偷不闕外戶息吠犬悉把鈎
鋤誰帶牛雨暘不違禱舄鹵
數倍收吏却一錢賄獄無五
木囚黃堂坐嘯有餘暇八詠
新詩追隱侯斯民幸使君畢
世為吾休俄及瓜時代本朝
官重內舊通金門籍行奉玉
宸對問君何以治海陵但陳
聖主之德臣何能狂生有意
水衡丞

送僧雲還吳興 雲喜作小詩稍不俗
甲戌七

月海陵賦

吳興道人美風度月下滄浪翹白鷺畫公詩律尚能傳
間有赤烏黃耳句海角相逢一笑新懷歸不待白蘋春
寄聲故國羣兒輩潦倒塵埃賀季真

答許景亮 許永嘉人字少明力學喜為詩惠

然出長篇見投况我以鄧高密謝太傅即賦
以答時予將為江夏之行兼與之別乙亥九
月京師賦

東嘉海上孕瓌怪之子人英晦當代發之辭章聊一噫

下界反

雷鼓霜鐘警聾聵投吾夜光敢下拜相期過高幸

少殺君家風鑒嚴簡汰顧吾衰遲積疴瘵久隱墻東慕
牛僧絕望中華安石輩老矣狂奴猶故態清思屢遭俗
子敗絮衣棘徑動胃礙京塵浼人更難奈行拏一舟犯
滂湃五斗無餘雜糠粃全家飫殮雲夢豈黃鶴登臨指
天外燕子西飛書可待訪吾少明安好在

贈僧孚

熙寧末予罷官趙郡日與僑人竇了

然游後十年復相遇于徐之蕭縣丙子三月
之官江夏舟次長蘆有僧永孚見過乃了然
也將之廬阜予要偕行乞一詩遂賦

北道交游實了然手持丹訣口談禪吾年方少不解事
貪酒狂歌相助癘十載驅車道梁楚汲水之陽一坏堵
著書直上窺鬻熊鄭圃潦園聊爾汝旋聞暫作去鄉行
聲迹相遼掃風雨我遭官縛未渠央君割塵緣遽如許
扁舟三月遡長川故人投謁俄童顛周妻何肉敗吾事

金史卷一百一十五
卷一
成佛定輸靈運先此行歷涉佳山水隨牒不妨行樂耳
與君更結蓮社游徑取孟囊付舟尾

送章邦傑移家餘杭包家山 章字子才熙寧

中僚友也自江州瑞昌令休官居城中十三
年不與人事為道友築室相招遂有是行丙
子五月道由九江邂逅章登舟南浦因賦是

詩

九江賢令尹千載兩相望昔也陶彭澤今之章瑞昌拂

衣置五斗高興挹羲皇避俗陶無悔達生吾與章淵明
三徑荒松菊我攜一瓢寓僧屋淵明乞食踵人門我賣
神丸辦蔬粥淵明為酒接休元我每移書謝州牧淵明
紙筆課兒曹我子長歌紫芝曲蕭間門戶十三年尚畏
塵緣生處熟行將卜隱包家山誓與蒼生鍊大還願君
門外誅榛菅來者勿拒容躋攀鏡湖遺老老且孱猶堪
護鼎訶神姦功成拔宅自仙去唯餘井臼留人間

題漢陽招真亭 亭在大別峰頂郡守吳興劉

言
一
卷一
誼宜翁營構以招江夏黃鶴之仙劉每自稱
有不死術亭成後二年物故于淮陰道中予
適見之一無它異丙子八月獨登因賦此

大別山顛清沔尾飛亭峒堯帶雲起清狂使君初燕喜
拍手招呼黃鶴子玄津煉出太陽酥丰茸胎髮蒙頭顱
每夸久落北鄴籍豈意齋恨歸黃墟越客登臨興何有
愁不能言病妨酒殘陽雲夢宵然深尚欲開襟吞八九
羽駕飄颻安在哉使君餘跡已塵埃但見庾令樓橫烟

樹杪角聲催月渡江來

晚出江城聞角 丙子九月晦江夏作

古濠沮洳荷葉枯
矍鑠禿鷲行且漁
山銜日脚水關掩
孤樓引角吹單于
胡馬西風興非淺
壯圖舊迹隨塵卷
秋盡湖邊雁不來
流落方悲去人遠
十月之交五夜長
河橫斗直天蒼涼
蘇門故里斗杓下
豈無伯仲勤相望
君不見剡蓬為矢
弧弦桑男兒落地
志四方履屐無根
著家巷道梁適楚
猶吾鄉雉鴝不踰
濟橘渡淮為枳吾

金上七尺 卷一
心況物未應然隨牒官身聊爾耳

寄漢陽趙尉沔 趙字道原滂之從兄丙子十

月江夏賦

慶湖遺老坐詩窮強仕之年百病攻誰謂南昌祿隱翁
伏枕呻吟四壁空相思限此江西東寄聲每託江頭風
斯言近俳聊一笑江水方清飢可療人生奇偶類探籌
造物豈容人數料君初試吏或當然我大半生真不調
昔不願起家百日登三司今不願還家六印金累累但

願官糧辦親養歸來尚餘三徑資鄰牆晏起訪安否爾
酌我歌堯舜時咄嗟此願良難必吞聲食蘗甘如蜜

送武庠歸隱終南 武字明叔近號今是翁衡

命巴峽還道由江夏過我乞詩為賦丙子十

二月

君不見南朝豪雋有郗生自厭出身時網嬰樂聞栖遁
去人者傾金累百贈其行關西武郎將家種心實慕儒
官冗從春走巴東歲暮還逢迎偶在江南夢過門把酒

豁清襟行將歸隱南山陰終焉之計咄嗟辦願賦一詩
輕百金吾聞自古咸秦稱陸海六印可求田莫買別墅
三千畝上腴將軍部曲猶多在未應親手把鉤鋤歲事
經營付家宰一官換得今是翁昔何所縛今誰解攜琴
領鶴白雲鄉身世相遼自兩忘北窗仰枕安足道未知
何者為羲皇豈不聞俛首塵埃百僚底南北推遷隨尺
紙摩肩接武半臺輿誰謂淮陰非噲比君家鼎甲盛先
唐兩都朱邸森相望天道惡盈幾赤族當時賴有安平

王慶牒蟬聯今幾代雲孫庠繼游方外他時野史逸民
篇鑄也磨鉛跋而待

送鄂州刑獄掾王懋元功罷官還海陵兼簡金

陵和上人 前此三年予客海陵送王之官

酌別于橫塘山此詩丁丑二月賦

暖雲芳草橫塘路送客何之官鄂渚江臯暑濕氣如蒸
別來何之還海陵海陵鄂渚非吾土每後君來先我去
人無根帶本悠悠況指滄波是舟路君方少健我哀遲

跼蹙輾間不自持因行寄聲雁門遠歲暮敢忘林下期
好去將無同語掾行見春風花滿縣隱顯他年不我遺
為續白蓮社中十八傳

玉鈎環歌 諸王孫士汙澄源以蒼玉環螳螂
鈎見貺助飭野服因以珉玉盤博山爐成氏
箭建璣龍茶五物并此歌為報丁丑十月江
夏賦

良工得玉藍溪窟相璞命形心匠出螳螂倔强

平

疑有

骨頸系一環猶莫屈鏡湖老狂厭袍笏素襖纁紹須此
物價比連城不容乞王侯輟好人所難何以報之明月
盤薰爐波面山噴吼吾鄉美竒鷗雞翰閩薨免盃霜毛
寒稱是頭貢雙龍團聊送公齋增冗長短歌粗可評珍
貺吾方野裝事游放跼步臞顏曳藜杖薄暮微吟江漢
上彼漁丈人誤相訪謂似三閭大夫樣

南樓歌送武昌慎太守還朝 慎名宗傑吳人
其先錢氏貴戚戊寅三月江夏賦

君不見鄂渚山環少去城半高牙之衝仰飛觀徘徊華

月天一隅縹緲青山江兩岸題榜南樓非昔時今人可

復識元規唯餘在得昔明月與此江山常住持公堂坐

嘯無留事清夜登臨誰辦此流風逸響殆千年初見東

吳貴公子剗繁健手付方州迎刃未始逢金牛潢池小

兒歸田疇田無高下乃多收每尋不淺胡床興更有歌

人行酒籌明日雲颿望堯闕鏡湖老生愁欲絕一錢何

敢浼劉公送行聊以南樓月照見金閨待漏時結佩正

冠勤曉謁公乎莫負鱸魚菰菜期衣錦東還使持節

題黃岡東坡潘氏亦顏齋 潘幽老昆仲躬耕
于東坡葺亦顏齋以偃息求詩于我為賦之
元符戊寅六月江夏作

東坡有田誰料理鰾面蒼毛潘氏子結茅題榜亦顏齋
農隙把書聊自喜潘乎潘乎信是顏之徒終日何所論
難真如愚世無孔父四科友猶辦簞食瓢飲陋巷環墻
居百畝之收粒可數天南有待東坡主更輸什一補官

倉餘勺幾何供雀鼠會須不改其樂媚而翁力田水旱
由天公大勝心迹相違阮校尉東西南北哭途窮

慶湖遺老詩集卷一

欽定四庫全書

慶湖遺老詩集卷二

宋 賀鑄 撰

古體詩上四十首

故鄴 按鄴都記漢建安十二年曹操滅袁氏
始大築鄴當時京兆洛陽南陽許皆大都而
鄴為之長操子丕代漢復定都洛陽此後僭
竊更據鄴而未始殘破元魏孝文帝自代南
巡駐蹕鄴下久之以南望柏人山北接柏人

縣非善地遂去之河南將作挂飯罌于城樓
上識者解之挂飯懸飡也豈待玄孫宅此乎
至孝靜帝果為高歡劫遷都鄴齊五主營建
宮室規模壯麗遠逾前魏周武平齊焚撤畧
盡及楊堅克尉迥遂滂瀆之築京觀于葛屨
山徙郡汝安陽鄴猶為屬邑熙寧間始廢之
戊午九月獨游晚歸馬上賦

魏武昔恢圖北平譚尚孽卜鄴築新都非徒三狡穴將

行遷鼎志遽有分香訣落日總帷空莫終歌舞闕旋聞
灑洛上載起蒼龍闕四葉不歸東苔花馳道絕食槽識
終闕挂飯期先決擾攘百年間覆車尋此轍山川氣象
變朝市繁華歇白露復青蕪茫茫換時節陰風吹葛屨
燐火走兵血木葉下西陵寒蟲助騷屑當時陪葬骨馬
鬣猶環列隧碣仆縱橫鐫文久殘缺帛砧與柱礎螭首
随分裂指此一抔間賢愚兩何別悠悠鳳漳水寂寂雀
臺月千古配英魂未随埃盡滅田臯訪遺老謂有興亡

說但聽黍離篇叱牛耕不輟

喜雨 己未予官滄陽涉春旱熱四月晦雨始

大澍而二麥已稿死采老農之言賦是詩

終春久旱曠涉夏俄溽暑垢汙浼衣襟梅津蒸柱礎黃
霾閉赤景測候錯辰午沙燕逐風鳶翻飛邈來雨紛紛
白羽箭齊發萬牛弩落瓦復鳴堦浮漚如沸煮崇朝已
沛浹枯渴頃清瘡田父喜過從迎門好相語蠶桑薄可
具豚酒與簫鼓擇吉謝叢祠巫孃罷狂舞晨炊飽丁壯

庇笠耕瀉鹵少緩麥租期庶將秋稼補輸入太倉中蕃
肥任黃鼠

老槐 邯鄲郡南溢水上有大老槐無復生意
人偶夜休其下聞吟嘆之聲發空腹中蓋梟
狐所憑而里人輒以為神也因築壇建社祀
禱甚勤予感而賦是詩己未八月

老樹久枯禿俯臨清路塵曾無席地蔭庇暍及斯民梟
巢與狐穴兇怪相憑親嗥嘯屬陰黑驚搖旁近人周環

築級壇立社祀秋春既享不材壽濫當有土神勿惑巫
婦言請揮樵夫斤猶疑終竊據復作後來薪

過鼃掾端智 鼃字祖禹潯陽法曹掾己未九

月賦

西風吹晚雨饑雀噪寒叢文舉對談客坐慚觴豆空咄
嗟宦游子貧病畧相同斗俸折腰得醉錢常不供君看
北里兒高堂燕歌鐘雖誇酒無算飽德何由豐吾豈乞
墻者不為妻妾容永懷冰檠操未媿屠酤雄

春行 庚申三月淦陽賦

風俗喜嘉辰行樂東城春人歌芍藥章馬渡楊柳津田
畝久枯渴麥芒棲暗塵焦心戴白叟日望西郊雲

對酒 庚申三月晦淦陽賦

白駒不可駐尺璧非所珍獨挹一樽酒悲歌送徂春歌
闌酒亦盡回首迹已陳自笑十年仕尚迷天下津豈無
濯纓水奈爾長路塵命也復何道今人猶昔人

閒情二首 庚申四月同淦陽田參軍至明賦

青窗隱夕曛玉甃紫苔春佳人久不見翠被銷檀薰長
巾拂綠綺上有三年塵聊彈別燕弄寄謝陽臺雲

秋風動朱箔流塵污鴛綺念昔合歡人兩心今萬里冰
霜變松竹況復如桃李欲寓相思文無多右軍紙

題巫山圖 淦陽張氏出此圖蓋唐人畫庚申

四月賦

巫山彼美

闕

秀色發朝雲絢麗不可挹飄飄去無痕楚

夢一夕後蒼山秋復春日斷腸亦斷往來今古人

詛蚊 庚申五月溢陽賦

公舍踞陰溝維蚊得所在朝昕滅聲迹曛暮相期會挾
是黨與繁豈資軀力大飢心過狼貪毒喙甚蜂蠆俯張
巧中去人勇悍將何奈貧無綃葛綢拙計燃蕭艾徒自
取熏蒸舉家更平噉欬烟銷尚鼓篴夜久禦益懈坦腹
恣交攻煩癢如搔疥神疲復夢悸少不容清快如何造
物工種此生民害安得長風驅投諸四荒外斷之嚴霜
誅併命不可貸醜類倘一遺餘孽行當再

燭蛾 庚申五月溢陽席上賦

鬼蛾來翩翩慕此堂上燭附炎竟何功自取焚如酷感
彼萬動微保生在無欲不見清林蟬飲風聊自足

病暑 庚申六月溢陽賦

早夏景延永烈日天中央歛歛燎原野中去人如探湯
病肺苦焦渴吐舌生喉瘡蔗漿與茗飲未易蘇膏肓稍
驚氣象變雲物來冥茫仰枕視簷際浩浩浮滄江忽得
濯頂偈灑然心地涼雷公未鼓怒風伯何猖狂掃蕩太

宇空萬影才斜陽俯辭楚臺上拱立齊鼎旁一介命螻
蟻敢干私雨暘田夫信無罪觸熱正驅蝗

暑夜 庚申六月滄陽賦

渴蟬鳴中夜木葉

闕

無風襟袵不加帶猶如被蒙茸三

庚信可畏一扇曾何功安得解民愠蒼梧理古桐

問內 庚申六月滄陽賦

庚伏厭蒸暑細君弄鍼縷烏綈百結裘茹繭加彌補勞
問汝何為經營特先期婦工乃我職一日安敢墮嘗聞

古俚語君子毋見嗤癭女將有行始求燃艾醫須衣待
僵凍何異斯人癡蕉葛此時好冰霜非所宜

食炎實作 庚申六月邯鄲郡從事錢景綦德

父席上賦

錢侯官舍旁走水來方塘暑雨過初伏斜陽生晚涼風
翻炎盤卷萬觥爭低昂猶疑秦雞暴擅此六國塲下榻
延密客開樽薦新嘗金刀剥老蚌玉沙磨夜光殷勤煩
釘飣未咀悲生腸引領鄘衛西百泉乃吾鄉水產富此

物數錢論斗量朝飡取饜飽無復炊黃梁貪嗜比羊棗
況乎惟味良十年去國仕遇得才微芒季鷹思萼羹拂
衣謝齊王我亦散浪者未許斯人狂長歌定行矣千載
會相望

烹雞歎 庚申七月客過滄陽道近時有人觀
庖人宰三雞一雄就縛而鳴不輟因歎曰禽
鳥將死知時且鳴吾安得默默求容于世因
極口肆言俄抵機穽幾不得免于感而賦此

云

膳夫縛三雞二雌先就烹一雄置机上不廢知時鳴有
客見之嘆人情猶物情寧昌言即死何喋口偷生愚聞
此客言退思因竊評雞實鼎俎資殺身非罪聲人忘樞
機械鼓舌為禍萌宜念千金軀與雞何重輕

題華陽公主碑陰 按碑公主名季艷魏孝文

帝之孫年十四降高歡弟琛主與琛皆蚤死
齊建國琛追王趙郡主為王妃碑表其墓廬

思道文姚淑書在淦陽之南七里庚申八月

晦日賦

王姬乘鳳去春色一朝空昔怨綺羅月今無松柏風千
年見白日狐穴入幽宮玉鏡古塵滿落梅誰復容
我當墜碑寶刻一何工文擅色絲美但書膏邑封惜非文
夫烈不得傳無窮好在故時物清漳流自東

題蘭陵王碑陰 碑載王名肅字長恭北齊文

襄之子按北史直書長恭而沒其名蓋當時

以字行而史失其詳爾王有武畧善撫士每
得一瓜數李必分甘餌衆金墉之戰免胄先
登推功第一今蘭陵王曲即凱歌也為後主
所忌得疾不治而卒以鳩薨碑陰刻王弟延
宗一詩甚哀墓在滏陽西南十里道占其東
夏潦所湊壠已半圯碑字大蕪寸隸法有古
氣而不著書人名文乃盧思道也庚申九月

十日賦

齊室生武賢蘭陵乃頗牧拊爪饗虎士饜飫比梁肉金
墉免胄戰破陣何神速樂府有遺聲當歌凱旋曲盤宗
既不壽霸祚宜爾促十代六百年人間換陵谷荒途接
幽壠誰復禁樵牧窆石半欹摧鉤鋤斷鼃足蒼苔蝕琢
刻仰睇眩塵目操翰無媿辭千言不為辱流湍齧馬鬣
客土日危蹙靈潦併年間彌漫即川陸昔多萬兩送今
無一杯築人生妄區別共盡同草木何待雍門彈令君
淚盈臑

邯鄲郡樓晚望 庚申九月賦

新涼瀉軒檻草木帶秋聲
澗水倒嵐影洗磨刀戟明
百蟲莫吟動一鳥歸思輕
晚律駭徂景羈懷念勞生
去國亦已久已年今復庚
官倉容雀耗世路忌蝸爭
顧我實荒浪誤拋樵與耕
竹木微逕在奚獨古人行

答杜仲觀登叢臺見寄 庚申九月潞陽賦

高風蕩河漢白露被寒菊
下有絡緯蟲淒酸生意促
華年不相待去我何流速
老步失騰驤短轅甘跼蹙
伊人

濮陽秀方厭折腰辱仕途塞榛蕪低徊避魍蜮邯鄲古
都會陳迹武靈築興發即登臨西南幾窮目新詩琢璫
琰疊寄三兩幅一聽郢中歌陽春回草木行將及瓜代
暫喜擺羈束鞭馬徑相過連朝奉游矚隻雞與斗黍禮
意未為足何以遇高陽多營甕頭醪

冬夜寓直 庚申十月潞陽賦

落月半侵窗蛩聲寒到牀羈人不堪此夢後夜仍長結
衣出庭戶河漢正蒼涼浮陰暝四野來雁不知行陳物

愁莫節畏塗懷故鄉十年泥滓賤半生靴板忙豈不志
事功筋骸難自強壯毛抽寸霜烈胆磨尺鋼素尚竟誰
許行歌追楚狂

送武桓之安陽 辛酉七月冠氏席上賦

黃金絡征轡之子待明發樽酒少遲留禪林見涼月歌
鬢結蛾黛怨此佳期濶去去柳堤風青蟬催白髮

寄杜邯鄲 予寓居魏之冠氏杜仲觀以詩相

招屬大河北徙莫知其津竟不果赴但賦此

答之時辛酉八月也

窮巷厭多雨顏垣藜藿生
蜩蟬飽風露晏景一何清
坐指歲芳歇羈人心骨驚
所懷不可見東州聞政聲
三年但絃歌百里稱
神明風月動高興
詩章時一鳴
天葩落健筆
直與春工爭
渾河失故渠
怒水方縱橫
難憑東葦濟
跬步萬里程
夢想不知遠
笑談何可并
賴有西飛翰
尺紙緘馳情

訪周沆郭忱

周字文清郭字天輔
皆吾僚壻

也辛酉仲冬自魏趨闕始及北郊首訪二子
于葫蘆園延欸連日因賦是詩

前日去薄官驅車望城闕情親周與郭契濶多年別征
袍未及解徑造郊扉謁存問審安娛芝眉慰懷渴家飽
具羹炙笑我猶饕餮野色夜蒼茫松陰步微月悲風應
長嘯洒面若冰雪狹室燭光清壞爐擁駝褐歡呼講舊
好鄰夢憎驚晤念昔初冠年朋從事顛蹶忽忽一回首
身志老成拙居諸信遄邁又值陽生節春物行可期良

游須屢結婦家酒醅美升斗容丐輟斟酌挹東君手選
時芳折樽前有餘樂身外無所切欲尋玉清路難訪金
丹訣修短三萬朝黃塵共埋滅

除夜嘆 辛酉京師示周沆

壯髮忽種種華年今復窮客懷少安適况乃京塵中病
肺厭斟酌疲筋謝過從閒坊稅老屋車馬無來蹤日俸
才百錢鹽齏猶不供夜榻覆龍具晨炊熏馬通出門欲
貸乞羞汗難為容安得一扁舟浮家乘興東江山北深

隱終老為田翁春秧二頃苗秋獲期百鍾稚子課樵汲
壯妻兼織春行歌滄浪清卧快柴桑風神明養內觀憂
患無旁攻有客聞此言謂予何不衷茲行果勇決誰攬
冥冥鴻安知祿籍間去就如樊籠微尚良自信所悲君
不同

寄杜仲觀 辛酉二月予罷官淦陽訪仲觀于

邯鄲屬雨後晴和城邑人已衣袷既登叢臺
風色淒緊尚如隆冬時臺下有佛祠庭中得

斷碑乃蔡有鄰書嚴挺之叢臺懷古賦也因
請仲觀樹之壁間佛祠西去二里有王氏
園偶諸俳倡將祀神者因置酒按之邑人丘
岩起次說與焉明日相別是冬仲觀亦受代
復調南康舡官壬戌八月予至彭城登高有
懷因賦此以寄

中春雨收霽與子登叢臺形勝宛然在太行西北來無
情百尺土千載未推頽四顧發悲嘯淒風振頽頽凌高

氣象變似不容徘徊下出破禪剝斷碑生紫苔嚴公賦
懷古復使後人哀西尋王氏園一徑趨城隈老竹未萌
筍繁花如雪開惠然丘少年逸躅欣攀陪小榭羅醺豆
開簾按俳詼招呼縹緲人晚鐘催妝梅水調唱金縷雲
疊浮玉醕傾觴敢惜醉忘着接羅回明日遂分手舊游
安在哉我為東徐官客鬢樓塵埃君調南康吏江山役
清才西風吹去雁尺紙為君裁我已困推辱壯心如濕
灰行將隱名姓采藥孫登嵬

共城山名

異日儻相過衡門剪

蒿萊

游雲龍張氏山居 雲龍山距彭城郭南三里
郡人張天驥聖途築亭於西麓元豐初郡守
眉山蘇公屢登燕于此亭下畜二鶴因以放
鶴名亭復為之記亭下有小屋曰蘇齋壁間
榜眉山所留二詩及畫大枯株亦公醉筆也
亭上一徑至山腹有石如礮治者公復題三
十許字記戊午仲冬雪後與二三子攜惠山

泉烹鳳團此巖下張即饒之壬戌秋予初至
徐張惠然見臨繼相招與山中游八月晦日
遂往暮歸馬上賦此

昔聞張逸民卜築雲龍山東望結遐想喜得彭城官一
語定襟契宛如平生歡招攜屬休沐投此蘿薜間女僕
候門巷闕桂雙翠鬟蘇齋軒戶明餅火焚椒蘭寶墨鬼

神護清詩冰玉寒森然拱簷雷架石排琅玕東趨放鶴
亭磴道披茅菅指顧百村落炊烟林莽間日腳洒平陸

兩山如斷髮淒風振晚葉坐怯衣裘單引領紫霄極飄
飄如可干緬懷眉山公五馬來游盤酣興走顛筆蒼崖
即鏡刊午年仲冬月雪野雲彌漫掃石坐舒嘯惠泉烹
鳳團當時詫盛集千古陋達安俛仰迹遂陳斯人久泥
蟠我來後十日逸躅何由攀遇勝不能賦俯尋塵路還
山英移未勒時欸白雲關

登黃樓有懷蘇眉山 時公謫居黃岡壬戌八

月彭城作

卷二
登黃樓望黃州黃州望不見樓下水東流水流何可留
浮雲更悠悠傷心澤畔客憔悴楚蘭秋

秋懷二首

壬戌九月彭城賦

室邇人尚遠況乎千里間豈徒道路長重水復重山清
霜老芳物嘉樹不堪攀欲寄隴頭信春風殊未還

蕭蕭庭木落格格雞聲惡荒簷日影斜飢猫捕黃雀窗
間養痾客起念邱園樂欲賦歸去來西風老藜藿

燕子樓

唐徐牧張建封晚得姬人眄眄寵嬖

之為起燕子樓于使宅北城上以處焉後更
兵火樓不復存天聖中故相濮陽李公出守
彭城復樓於故址壬戌重九後一日予與二
三僚友置酒樓上分韻賦詩偶得如字而侍
酒官妓亦有名眇眇者蓋竊希唐人因為見
于卒章

城據山川勝千年楚故都高樓臨汴水楊柳蔭芙蓉唐
室中多故將軍老鎮徐毬場朝戲馬玉帳夜投壺白雪

徵清唱黃金得綠珠春風樓上醺三日極歡娛紅粉夢
雲散白楊兵火餘當年賀厦燕老盡幾番離曲徑擁黃
葉西風時掃除寒鴟蹲老樹睥睨女牆狐有客晚登覽
傍徨思壯圖荆榛閉銅雀麋鹿遊姑蘇陳迹豈足道舊
歡何日無朱闌開酒場寶勒迎官奴醉袖舞雩鵲艷聲
歌鷓鴣遲留故時月桂影來座隅回首一相詫今人如
不如

快哉亭

彭城郡城之東南隅提點刑獄官廢

解也熙寧末魏郡李公持節來此構亭上郡
太守眉山蘇公命名曰快哉亭下有真塏數
十步即唐人薛能陽春亭故址也癸亥六月
始登此亭因賦是詩

飛亭冠城隅空濶延四望夙昔兩文雄胡牀此相向山
川氣候美詩酒風神王彈壓許昌侯陽春慙俚唱麾車
忽南北榮辱生譽謗一躡雲達間一落江湖上我來得
陳躡伏檻徒怊悵可畏此塵籠歸哉養荒浪

飛鳴亭

彭城南禪佛祠據戲馬臺之麓有岩

山出其上方廣信倍尋可立柱石癸亥秋九月太守河南王公說命僧起亭冠焉亭成置酒以落之而未得嘉名以稱也時天晴木落旅雁南下復有聲琴于座者公偶誦嵇叔夜目送歸鴻手拊五絃之詩因以飛鳴榜之是冬十二月十日復與李昭玘成父楊中立同登因賦是詩

禪林跨山脅飛構鑿峻嶒千里寄雙睫百憂消一登斯
游屬公暇曉日東南升霜野明練甲雲陰垂海鵬東州
地陽暖臘月川無冰大船出洪口突去如騫騰趺坐思
方寂桐魚聞飯僧生臺飽馴鴿散上浮圖層矯首發長
嘯清風鼓塵膺寥寥紫虛路鴻雁正憑陵仿佛中散公
俯手朱絲繩粉繪久零落爽靈呼不磨顧予識尤寡况
復無才稱行且置纓笏庵棲宗大乘二子勿多誚有心
何不能

上已後一日登快哉亭作 甲子年賦

上已信嘉辰流觴傳舊俗良游悵不遂吏局方有屬東
風吹曉雨萬竅皁林麓疑有泊舟人狂歌河女曲逾朝
始澄霽物色如新沐城角趨去危亭登臨尉幽獨紛華
掃不見胡蝶飛平綠竚倚窮夕曛悠哉此心目

讀李益詩 甲子夏與彭城詩社諸君分閱唐

諸家詩采其平生人賦一章以姓為韻君虞

益字也見從軍詩序

君虞興聖孫詩律早專美樂府度新聲宮醑奉天子鮮
風獵蘭苔華月濯桃李獨有連眉郎才稱劣相比頗聞
竹窓句流落綺紉耳吏曹久失調幕府感恩起從軍五
十篇王粲慙率爾胡沙動霜草開卷得千里騫翔大蓬
拜轉顧觸排毀晚升八座崇謝事知所止高文茂支庶
埋滅長已矣斯人今不亡正賴數番紙吐嗟齒逾壯日
就無聞恥勉哉課誼吟請自田居始

田園樂 甲子八月與彭城詩社諸君會南臺

佛祠望田畝秋成農有喜色誦王摩詰田園
樂因分韻擬之予得邨字

昔我未去園幽棲淇上村分辭俠少事喜與農老言農
老孰追從四鄰皆世婚機中工織婦籍上成丁孫青駒
自走磨黃犬長候門昨日春大開道遙望高原西照牛
羊下東風花草繁今朝夏雞鳴麥熟田頭喧歸來息樹
蔭課汲灌中園秋賽方及辰釀秫烹膏豚叢祠响腰鼓
免杖奉神樽冬雪斷門巷蠶廬清且溫地藉熊豹席爐

明荆樞根起居就安適非復繫晨昏不識百里面不知
千騎尊供輸先衆期于我何威恩太上復淳古坐起義
與軒敢忘天地施擊壤聲如塤畢此百歲願泰然長夜
魂避秦誰氏子客死武陵源

此日足可惜 甲子九月彭城寇元弼席上賦
此日足可惜此樽何可辭人生信浮寓老境將安之念
昔青衿歲九七殊未知忽忽俯仰間復見趨庭兒名繫
冗從籍顧亦何能為撫此多病軀敢有黃髮期每虞斃

奔走明哲永見嗤後日賣刀劍買牛耕故陂不但力作
勤農事有閒時慨想無心子清言真我師

部兵之狄丘道中懷寄彭城社友 甲子十二

月賦

駕言出北門徒御何遲遲日氣方洶湧霜陰亦紛披役
夫前驅行少婦痛不隨分攜仰天哭聲盡有餘悲雖非
遠行邁要之為別離顧我豈無家從公難遂私且懷二
三友缺此文酒期臨分各有贈婉思見乎詞吟風一回

首烟林失城池相思重相過斗黍為君炊

三月二十日遊南臺 與陳傳道張謀父王文
舉乙丑同賦互取姓為韻予得陳字

晴春六十日不與酒杯親吏事豈無閒風雨復兼旬始
作南城游時物固已陳君不見桃李濃綠迷荆榛登高
暫逍遙引目清泗濱向田有交逕俯城皆要津得意屬
禽魚可愛不可馴顧予千里客眷此十日春胡不念爾
生筋骸勞欠伸二十起丁籍一官初為貧俯張西復東

甌滿萊蕪塵黃綬彼何物豕苓安足珍山園有芳蘭幽
佩手自紉長哦白雲謠遐想紫陽真去矣南昌尉庶幾
乎若人


夏夜懷寄傳道

陳攝領雙溝戍稅局乙丑彭

城作

疲筋任藜杖行藥下僧坊月出河漢白雨餘草木涼有
懷社中子引首東南望高韻少諧結何心事征商泗濱
六七月萬柳鳴蜩蟬大編寄我來迎風坐胡牀投錢授

赤券豈所試君長申退尚多暇不無金玉章而予方執
熱思得濯滄浪雲牋儻寫寄珍重未相忘



慶湖遺老詩集卷二

欽定四庫全書

集部

慶湖遺老詩集卷三至五

詳校官庶吉士臣陳若霖

侍讀臣孫球履勘

覆校官中書臣宋枋遠

校對官中書臣王鍾泰

謄錄舉人臣劉禮

欽定四庫全書

慶湖遺老詩集卷三

宋 賀鑄 撰

古體詩中四十首

和張謀父游石佛山觀魏太武書 按南北史

彭城圖經魏太平真君十一年太武南侵至

瓜埠築宮駐蹕聲欲渡江宋人患之遣使請

婚饋百牢以搞師明年春旋師渡淮復留連

徐方再旬始北去今彭城南五里因山鑿佛

高十許丈東北百步有大盤石敲枕小溪劃
然四字曰阿彌陀佛皆徑尺餘特陀佛兩字
為逸筆結之其長倍尋下落溪中蓋當時太
武以鐵筆畫是字非刊刻也乙丑秋張謀父
摹墨本見惠蕪賦一詩要予屬和焉

中夏昔屯否代邦天所開鴻圖屬太武不世英雄才南
洗洛陽血西盪長安灰羶車十萬乘畧地驅風雷一葦
濟長淮築宮瓜步隈東鄰拜牢饌走使為婚媒雲旗即

歸路覽勝此徘徊揮鐵馬鞭頑石同陶坏劃成四大
字屹栗陰虹摧淪精入崖壑怒氣羞蟠回茫茫六百年
風雨生莓苔偉蹟寢銷泯威靈安在哉生存貴無上零
落等塵埃君為訪古游賦詩追七哀人生誰不爾莫負
手中杯

夜行鄒縣道中遇雨作 乙丑八月被外計檄

自徐趨鄆道中賦

昨日秋遂分邨邨斂禾黍半夜宿田人相噓去深陂雨

駸駸馬上客厭浥投何所暮發鄒子城朝期飯東魯據
鞍思假寐顛墜慙不武俯畏道傍石積然如伏虎遠驚
喬麥花白水漫洲渚安能叱吾馭親闡寄西楚念昔卧
蘇門夙興猶及午豈謂從一官羈離遽如許歸歟惜遲
暮幽懷將誰語賴爾草根蟲助我長吟苦

行路難 乙丑八月被外計檄召徐鄆往反千

二百里由荒山廣澤皆畏途也而期會甚嚴
夜不遑息因賦是詩命曰行路難

驚飈獵榛莽西山匿頽陽四五陰魄晚繁星亦光芒驅
車何所投却顧歸路長挾轅兩羸牸犯此豹虎場安得
渥洼駿皎旦游康莊豈徒寫我憂要使塵不揚

送寇元弼王文舉 文舉乃元弼女兄之子而
復妻以女寇之官符離之荆山戍王亦從行
乙丑八月彭城賦

無端嵇氏叟早結曹家偶不遂龍蛇藏翻從牛馬走東
西祇強顏清鏡笑人頑敲枕知歸路開屏認舊山甘心

折腰膂為飽來西楚始驗釜生魚還悲廁中鼠兩君冰
玉人傾蓋許相親何意塵埃地歛游雲漢津佳時第行
樂不與華年約大白酒交醕長箋詩間作俄報戌期秋
扁舟去莫留臺鄉淮水北和氏玉坑頭飄飄同李郭到
岸逢搖落俱是長年人得忘彌日惡勞生不自知會合
復何時籠鳥檻猿思烹雞炊黍期此期諒難必幸勿忘
今日固有夢依依可無書一一徐國壯山河黃樓入望
多後時三五夕奈爾月明何

人生七十稀 元祐丙寅正月彭城賦寄朝中

三二知舊

人生七十稀行年今已半事功貴及時遲暮復何算嗟
吾夙多負失怙在童丱詩禮思有聞飄飄辭祖貫慈親
念衰緒猝猝營婚宦名姓係西班星霜亟徂換未築黃
金臺長歌白石爛豈無同心契相望渺雲漢每虞狂飈
至摧折澗底榦異日偶班輸抱柯徒永歎

和杜仲觀青字詩二首 丙寅四月京師賦

青袍少年子獨出青門游逢人少青眼凝笑望青樓窗
中青娥女正為青春愁心事屬青鳥青驄能少留白馬
青絡頭青萍寶帶鈎青溪流水急獨上青翰舟佳人青
雀釵手把青荷游慕君青雲罷青髮結綢繆

送李主簿夷行之官河陰四首 李字易初翰

林郎鄆公孫少年苦學元豐壬戌任東平戶

曹掾攝彭城錢官子實為代元祐丙寅相遇

于京師九月汴洛之官索詩為別遂賦彭城

予贈李詩有他年會相訪分卧北山雲之句

詩在別卷

夙昔一尊酒相從清泗濱
回首歛四載長安逢故人
交情久益淡辭筆老加新
送子復西去勞生悲重陳
古來英特士往往沉下僚
念君鸞鵠姿俛首棲蓬蒿
霜氣斂陂澤伊流纔半篲
舟行何以尉酌酒誦離騷
君才本高絕流俗固難諧
桂生擣捩林寧免相突排
勾稽諒多暇簾箔蔽公齋
聖賢在黃卷差可遣人懷

少小縻一官身世兩相補為飽西復東志願劣兒乳不
無同心友頗壓折腰膺寄語北山雲異時吾與汝

擬南梁慧侶法師歎杵搗衣 丙寅十月京師

賦

嶧陽桐杵鳴蓮岳石跼平待罪相應節要自不勝情吹
衣風稍急弔影月微明今有不眠客聽此斷腸聲

擬阮步兵夜中不能寐 丙寅十月京師賦

夜久不成夢張燈開故書清霜屏雲物有月來庭除良

時悵難再不與佳人俱掩卷長太息望子城之隅

擬鮑溶寒宵嘆 丙寅十一月京師賦

孤缸照愁眠明滅知夜久熒熒月落牀撼撼風入牖美人悵何許寤言不相偶心寄南征鴻雲漢長回首

游雍丘燕溪分韻作 丁卯二月領大匠屬治

事至雍丘與故人吳擇仁智夫趙子漪澄之
同游因分韻賦詩予得漪字

捨轡步平陸解衿俯清池微風度修竹琴瑟生淪漪梨

華照晴影暖雪正紛披把酒久沉想況與玉人期

擬王少伯新興 丁卯四月京師賦

西北雲悠悠東南日杲杲浪語問陰晴懸知行雨少桃
溪換青蔭夙昔一何好臨牖思茫然微風動萱草

送陳傳道之官下邳 丁卯九月京居病中賦

兼簡彭城張謀父寇定應之

昔也官彭城日與君子親俱游大梁下不見輒兼旬衣
食牽迫人汗走長街塵相逢立馬語愁面如含辛朝來

忽叩門頗驚黃綬新告我即東下得官淮泗濱方吾病
中喝藥物苦殫貧故人復捨去此懷難重陳想見經舊
廬節候屬蕭辰朝尋張翁墅暮投寇叔鄰二子亦吾好
尺書坐因循交情定相訪為話正迷津

東畿舟居阻雪懷寄二三知舊三首 丁卯仲
冬抱病之官歷陽次陳留賦

舟路江淮永歲寒冰雪深戍期良敦迫王畿方滯淫疲
筋苦跼卧行藥長川陰雲物接平陸不見西飛禽風從

城闕來如聞鐘漏音昕霽更東邁區區子牟心

寒洛未漸結東趨江海深舟人驚朝鼓斂緯逗長林林
端落滯雪沙際起鳴禽病客坐長嘆攝衣涕流衿親朋
自茲遠可是慕山陰興盡莫回櫂何人知此心

沄沄清川流冉冉浮雲陰天寒日云暮魚鳥方潛沉吾
豈厭安隱東浮違宿心一官未足養老境行侵尋牛歌
感白石馬骨要黃金慙無子虛作萬里懸知音

留侯廟下作 按留侯本封沛國之留城今古

祠存焉晉義熙中宋公鎮徐嘗下教修繕今
祠中石刻雖破裂猶可識予官彭城日欲賦
一詩忽忽不暇及丁卯冬汭洛東下阻冰于
陳留舟次有神祠特嚴邃榜曰漢留侯廟蓋
邑人誤謂侯封為陳留也予時抱疾困因默
有禱焉歲暮疾平賦此詩具冠笏拜謁高吟
神坐前償宿志也

文成念韓痛破產伺強秦千金募健士雄斷屬車塵東

去變名姓浮游淮泗濱忍恥奉遺履得書何老人十年
風雲會赤帝資經綸鴻門禍端結一言即解紛英彭既
合縱楚項提孤軍偉哉借箸談豎儒無復陳分疆餌兩
將來若從龍雲釋怨俾侯印謀銷蛇豕羣定都天府國
推功歸奉春四老落吾術拂巾辭隱淪東朝羽翼就楚
調徒悲辛出處能事畢致君終乞身豈眷萬戶封僅與
蕭鄼均淮陰敗晚節顧亦非吾倫願訪赤松子逍遙雲
漢津強飯示終歿爽靈方上賓嚴祠鎮川湄餘澤及斯

民客子老將至低回冗從臣慙無應時策肝膈空輪囷
可教固無類慨然輒求伸未應終萬古黃石獨能神

游靈壁蘭臯園 集賢張校理治此園以奉親

因名蘭臯戊辰二月予舟行次靈壁訪張氏
子碩于園中諸亭壁間得故人東萊寇元弼
三四詩因繼題十八韻兼簡元弼

集仙昔榮養卜築循蘭陔深徑萬株合清池百畝開飛
梁蔭茁茁攢棟跨崔嵬淮海斲紅藥瀟湘移翠栽岱松

佩蘿薦海石糊莓苔車馬遠驚聒魚鳥忘嫌猜病客倦
舟楫尋春此徘徊閨年物候遲前日已聞雷薄景未稀
雪東風新破梅主人京洛舊杖屨容參陪指我艮隅地
方營秋月臺眼明壁間字醉墨題東萊短句頗清絕早
推能賦才殷勤卷白苧為爾拂塵埃安得一攜手更傾
林下杯酒闌話平昔豈復顧形骸行役浸相遠人生信
悠哉薄暮重回首長哦歸去來

題楊子王輅故居清軒 戊辰上巳日賦

卜築負南郭，褰開臨要津。
舟輿占集地，奈爾獨清人。
坐上一樽酒，江南千里春。
何須茂弘扇，何患元規塵。
游子感陳躅，恍如平生親。
九原不可作，歸老復誰鄰。

游金陵雨花臺 在城之西南，蓋生公講堂故址也。
南即石子岡，登覽盡江南之勝。戊辰三月，舟次金陵，與同行李延永游，西望石磧，戌纔如數里之許耳。

迢迢朱雀航，飛蓋共凌越。
東風石子岡，芳草微徑絕。
生

公法堂在清夜貯明月回認城郭游春華爛晴雪長烟
動江隩微雲泊山脅連檣去遲回白鳥屢明滅江山信
清麗人物久銷歇戍堡定荒涼投身計何拙塵衫與汗
馬端為老生設李侯朱門俊許與盡時哲俛首就微班
剛腸頗摧折人生特眠飯似是此生切歲晚賦歸田非
君復誰結

宿法惠寺 在歷陽西南九十里戊辰四月七

日公事至順天里越斗峴山冷泉澗薄晚投

宿此寺寺三隅面山而豁其西北竹樹邃密
如不與人境相接庭中有泉如輪清冽而甘
跨山起小閣榜曰餘翠登望曠快因賦是詩
題其上

驅馬越飛澗揚旌下回岡歛見層浮圖高風振琅璫重
門壯且深老柏森然行佛子出延客投鞭步長廊中庭
汲新泉一飲生清涼孤坐興登覽危梯趨上方蕭蕭荒
竹林簷外如環牆樵木斷行徑龍蛇知所藏山禽喜喧

暘嘯侶何琅琅子規特殷勤使人懷故鄉引領落西北
暮色來蒼茫一官早見縻微尚久未償明發復東去斯
游良不忘

題香社寺平疇湯泉 在歷陽西北四十里泉

石山東麓周環三十許步清澈而香或以竹
木投其中漬之一昔渥然如丹蓋靈砂伏其
下故飲之并浴者疾多愈因名平疇湯戊辰
四月十日公事至泉上遂賦是詩

驪山御湯殿歲久玉蓮傾誰謂大江北有泉溫且清相
傳白雲竇中閤丹砂英澡濯浹肌骨沉疴亟能平豈特
滌吾足徑當潔吾纓築廬俯源上涵泳鳬鷗輕非復罽
塵網御風朝玉京賦詩投楚澤用弔懷沙生

宿靈泉山慧日寺

在烏江東北七十里戊辰

中元日入夜公事至此邂逅越客嚴生因賦
是詩

日入不遑息驅車更之東回蹊出蒙密解袂迎長風

從何許來歷歷江南鐘頃轡阿蘭若虛庭月正中流螢
逗深竹白鳥巢青松華燈耿翠箔瑤花擢春叢絕境美
清夜忼非塵界逢惜無一樽酒幸與之子同明發即南
北浮生兩飛蓬

曉渡黃葉嶺東谷懷寄金陵王居士閒叟 在
烏江之北八十里戊辰七月十六日自寶泉
慧日寺之茅塘邨路由此

陰谷不寓暑風松朝露零乳溪逗綠篠琴筑聲泠泠老

石漬金碧宵然沉列星酌此石上泉餌彼松下苓倏歛
振飛步豈徒制頽齡何須歷五嶽即蹈神人庭顧子方
有役俗駕不敢停寄音采真子來訪白雲扃

腰疼山浮圖下作 在歷陽西北五十里戊辰

十月賦

茲山非峻極名不載圖譜投策一躋攀未覺病腰膂蒼
松帶寒白交陰層窳堵儼然黃面師粉繪色如古我貪
五斗米磬折向兒乳復著鞍馬勞疲筋劇苦楚此身異

金石能涉幾寒暑
誅茅結圓廬
晏坐此其所
清心日焚
誦庶拔未來
苦望塵彼何人
碌碌安足數

晚登柏子岡回望金陵懷寄鍾山泉禪師 在

烏江東北二十里已巳四月賦

晨征念王事
駑駕煩屢咄
既陟崔嵬高
稍辭叢薄密
烏牛霑宿露
白鳥明初日
清川舳艫遲
緣岸浮圖出
緬懷秣陵游
曾綴秦淮緯
曳舄白下門
供去香金粟室
得聞四句偈
如奉三尺律
損益非所知
婚嫁行且畢
庶幾追

老龐薄暮傲萬一誓將遷枳根待變江南橘

歷陽十詠

己巳五月歷陽張令夢以采縣境

陳迹十題要予同賦

麻湖 縣西二十里按縣譜本城邑漢明帝時

一夕淪為湖湖中有明府主簿魚甚美皆昔人所化也今俗呼訛為麻湖焉

昔也萬家邑今為無底淵城郭泯遺迹人民安得全
古一回首薄暮愁風烟拯溺不無意吾生後千年

雞籠山 縣西四十里按縣譜昔城邑將淪沒

神獨告一姥使西走即攜籠雞登是山籠化

石形猶然湖之東南有姥廟

楚姥昔奔迸餘生脫沉淪家禽不忍置信謂婦人仁空
籠歛變化千載高嶙峋可待麻湖水復生桑下塵

濡須塢 縣西南百里按縣譜孫仲謀築偃月

城以拒曹孟德即此塢也

孫郎昔鷹揚曹瞞方虎視敢忘版築勤遠挫兵鋒銳俄

聞青蓋謠無復金陵氣六代迭傾亡長江亦平地

遏胡城 縣西北三十里按縣譜昔石虎南侵

晉相王導築此壘以遏之

狂胡昔馮凌濶步長淮外難去此百雉城萬甲屯要害

時平一登望江山互襟帶想像文獻公清風宛如在

當利港 縣東二里下通大江按縣譜晉王濬

征吳乘便風趨石頭王渾招之不顧即此地

此詩當在遏胡城之前

龍驤乘上游銳氣吞敵境風便趨吳京收功在俄頃平生負雄圖晚歲方獲騁何必傳鼎彝江山與之永

天門山 縣東南五十里江導兩山之間殊湍悍按縣譜宋孝武嘗駐蹕此山上閱水軍發因建二石闕以夸武功今遺迹在焉

天門束箭流北注據牛弩凌高駐翠華舟師耀威武當時侍幃幄誰復徵往古虞舜有苗征端為兩堦舜

采石磯 縣東南二十里瀕江兩磯相對按縣

譜李太白嘗隱東磯上故址存焉

東西采石磯山水兩清絕漁舸與商舶今古幾泐越飄
飄翰林主長笑弄明月難訪物外游飛雲眇天末

百福寺 與縣解鄰按縣譜即唐詩人張司業
籍之故居也籍繪像今存

文昌西郭居修竹閉壞堵琴樽不復存青蓮開梵宇塵
紛晦遺像粉繪才可睹拜奠媿無言長哦君樂府

桃花塢 縣西二里麻溪上按縣譜張司業之

別墅也籍與孟郊載酒屢遊焉茂林修竹尤
占近郭之勝

種樹臨溪流開亭望城郭當年孟張輩載酒來行樂斯
人久埃滅節物今猶昨看取不言華春風自相約

平疴湯 縣西北四十里按縣譜湯泉下伏丹
砂浴之能愈疾故有平疴之名即劉夢得歷
陽記所謂沸井者也

文礎護清漪炯若涵冰玉澡滌起沉疴功參靈劑速荒

唐桑氏經瑣碎桐君錄利物本無窮何須塵簡牘

慶湖遺老詩集卷三

欽定四庫全書

慶湖遺老詩集卷四

宋 賀鑄 撰

古體詩下四十一首

三山 在金陵西南百里崛起大江之中昔王
龍驤順流鼓棹徑造三山謝玄暉登三山望
京邑皆此地也戊辰三月始游金陵置酒於
鳳凰臺引望此山如落天外雅符大中詩中
語既渡江至石磧戍門適與山對已巳六月

賦

南朝鳳凰臺置酒昔高會酒酣望三山宛在青天外長
哦謫僊吟如啖鯨鯢繪明日信東風孤帆出其背荒戍
接江濱開門適相對鼎足峙長川不為舟楫礙雨暘雲
吞吐早晏潮進退萬古免浮沉曾微扑鼇戴伊予厭塵
坭閉目何可奈爽氣豁衿靈山乎吾有賴嘗聞晉阿童
萬觴飛戈快徑造此山陞滄波為之隘闕我疲軟姿功
名讓前輩玄暉昔憑眺物色頗有在他時挂武冠刀劍

行且賣山價畧可酌庵棲謝當代遠持三山磯況彼七里瀨猶得傲狂奴吾無故人待

望夫石 在當塗北山上與歷陽當利門相直

己巳八月賦

亭亭思婦石下閔幾人代蕩子長不歸山椒久相待微雲蔭髮彩初日輝蛾黛秋雨疊苔衣春風舞蘿帶宛然姑射子矯首塵冥外陳迹遂忘窮佳期從莫再脫如魯秋氏妄結桑中愛玉質委淵沙悠悠復安在

題烏江湯泉寄老庵 庚午七月賦

兩庵松竹深薄暮更微雨山禽不畏人嘲啗方對語而
予倦宦者罷日今何數京邑夙所懷其如惡塵土行復
念斯游回頭悵何許

罷官有期懷寄歷陽朋好 庚午八月賦

迅雨蕩闌暑層飈披滯雲汀川繚楚甸新陽歷秋旻物
候豈不嘉中懷愴離羣親朋滿城邑繫滯此江濱及瓜
信非遥遂作河梁分何人具供帳樽酒展殷勤一聆雪

兒歌載

闕

遊子魂津鼓警朝夢

闕

烟生夕曛所悲紫蘭

纓復

闕

京洛塵春風有歸雁報我相思文

樣舟秦淮雨中寄侍其服之

庚午十二月賦

蓬卑每礙幘倉狹纔容席悽酸擁膝吟奈此風雨夕欣
聞鐘漏旦懷彼南城客欲往從之游塞塗沒吾屐方君
慕棲遁顧已淹行役後夜歲云除畸辰良足惜何當斤
氛閉新暘被東陌壺觴殿兩驂聊取一日適

金山游

辛未二月舟次廣陵同建安黃材成

伯黃樞集虛郡人陳庾敏善武寧張思永子
修為金山游賦詩得上字

輕舸放中濡岸遠春風壯檝師俯仰呼天水爭簸蕩吾
方扣其舷聊賡小海唱稍回即東麓側磴聯屨杖危剝
表層巔疲筋闕牽強斜廊繚複殿魚脊分背向放目四
垠寬秋毫入吾望侵雲鐵甕壘崛起去緣傍映日海門
山不帶滄波上吾雖百石吏平昔有微尚闕得金仙徒
剪蘿開岫幌誓投桑榆年浮玉翁自況

金山化成閣望焦山作 辛未二月與二黃陳

章四子同賦予得中字

朝登化成閣寫睇滄江東
歸然瘞鶴山屏截橫流中
雲烟生蔽虧水石相磨礱
飛構結巖腹天龍嚴佛宮
初無剗木智不與塵界通
曠莽天地間勝事豈易窮
將謀乘興人難去此迎潮風
可信浮桴約僅有由也同我
亦念行役翻如征北鴻他日
一漁艇悠悠浮玉翁

金山夜集招米芾元章不至作 辛未二月與

二黃陳章四子同賦予得王字

芳洲擷蘭珮清夜棲寶坊晚風駕飛濤柱石搖長廊微
月逗簷際助我燈燭光黃童天下才疊疊陳與章狂歌
間險語捧腹屢烘堂惜無杯中物可以延楚狂興闌半
道去浪學山陰王明發吾將還滄波渺相望如何方外
徒漫仕煩官倉端爾涼秋節白雲來帝鄉

廣陵山光寺夜集留別黃材昆仲 辛未二月

賦予得平字

維舟山光步却顧廣陵城十里春風外夾津芳草生漁
蓬嚙尾來媿爾故人情更卜連牀語神房溫自清語闌
夜自久淚燭翦復明撒樽兀相視酸涕流金纓我本山
海士誤遭時網嬰出身兩紀餘何等為浮名矧此一分
首幾年當合并離憂如驚瀾蕩滴未易平疎親繫遠邇
斯言出荒傖音郵無禁限動訪白雲兄

題崇勝寺無心庵 辛未六月京師賦

老鶴依林表孤雲寓山間結茅窮釋子著身如許閒有

心即塵紛無心猶石頑有無心併置日暮客來還

和錢適德循寓懷二首 辛未七月京師賦時

與錢鄰居

悠悠北山雲冉冉東門草紛吾起故居與邇即遠道巔
崖博錙銖得不償所耗寄語鄰牆翁歲晚從吾好

魯酒味自薄楚歌聲更悲曾無忘憂用安事酒歌為西
風激商序流芳迫衰遲寄語鄰牆客茲非行樂時

題天清寺安上人北軒 辛未八月京師賦

南城繁

音婆

氏臺維昔孝王葉歌吟寂無聞萬楹聯佛屋

道人開北牖俯就百喬木八月鳴清蟬槐蛾委平綠客
來借榻卧吹睡俄頃足踈雨隔斜陽垂虹跨長陸良游
悵遲後回謝三更速瘦馬尾華軒汗顏塵一掬昨非勿
復道佳約猶可續載酒定何時新黃糝庭菊

感庭棗

辛未七月京師賦

昔來花纂纂遽許實離離西風會搖落行復見空枝歲
物感流駛事功傷暮遲咄彼身後名前人端自欺書殫

南山竹庵庵定何知賢哉張生翰千載與心期

送表侄趙子億之官滄州兼簡通守李延寧

字叔永辛未十月京師賦

吾昔游浮陽童心初辨狂凌高瞰海日徑欲窮扶桑歲
紀忽再周此圖竟莫償今適送子往臨風但彷徨之子
公族秀祖基維懿王成吾家宅相裂封復吾鄉汝翁同
谷守視吾猶雁行後生古所畏之子未易量筦庫方試
吏事役須更平嘗譬彼汗血駒齒齊即騰驤是宜勤風

夜動虞三尺坊勿憚川陸遙千里如鄰牆勿計弦晦餘
俛仰度三霜邊朔昔云苦今歌海隅康正賴別駕賢不
減晉王祥依投得吏師行見售所長為吾語故人曩契
想未忘願致雙魚封繼以一鷄章

夏夜雨晴遣懷 癸酉歲京師春夏厭雨吾居
望春門東牛行街故西樞渤海公之高齋嘉
樹清風殊不知暑溼時卧病杜門每把書自
適五月望雨始收霽疾亦少間因賦是詩

積涼被廣陌誰過牛僧翁閉關養疴藥石收良工高
齋俯嘉樾疎箔延清風左右列圖史披張俄一通從嗤
獺祭魚聊學蠹書蟲坐挹古人語孰云吾道窮浮生夢
境間不帶之驚蓬生死猶物化今昔賢愚同分陰賤垂
棘白日莫再中薄暮紛淖澄寥寥還太空為問此何夕
涼蟾生自東荒哉西園士聯蓋追輕鴻行樂以至斯不
知息微躬側聆天雞鳴凡耳初破聾吾從汗漫游遡景
鞭垂虹濯纓咸池淵晞髮若木叢親串不我忘惠音赤

繡公長哦賦來歸閱闕世上雄

寄題栗亭縣名嘉亭 邑令趙洋更此新亭名

取杜甫同谷紀行詩栗亭名更嘉之句因其
親能希邈求吾詩癸酉九月將扶疾東下感
而為賦

少陵昔避地幽棲鳳皇川始願獲其所賦詩此終焉
彼美林麓蔭膏腴上田陽陂鏡垂珠陰谷繁玉延長
鏡勤采斲服食攀飛仙兵侵奪和氣力耕無善年林
垆開

冰雪旬浹斷庖烟嗚呼歌七章暮

闕

西南遷環堵久蕪

沒斯亭名尚傳茂宰愴懷古增崇殊過前雕甍揭長簾
下容十客筵嫩嵐隔春叢清竹鳴夏蟬風月有高興寫
之武城絃狂客屬尫廢駕筋難強鞭何暇遠登覽但哦
鯨海篇尚苦八口累依稀全曩賢餘齡寄幻境未斷東
西緣江淮米價平一舸去悠然幸此歲豐樂浮游吾所
便異時訪陳躅復使後人憐

游盱眙南山示楊介 楊善方藥著書甚多癸

酉十一月與之同游賦

曉霜無輕颺長淮淨如眼招攜南山游老子興不淺不
從千步橋飛渡一漁舸中流鼓素楫魴鱖歛驚跳禪叟
延游客匆匆問行色千里遠京關浮驂去安適長笑指
滄浪濯纓湔我裳朱門曳裾地槐柳自成行多年困靴
板未立中人產沉痼迫衰遲求田吐何晚神丸儻駐延
投此寄餘年鑿室鄰楊氏然薪繫太玄

酬別盱眙杜輿 杜字子師方築淮上東山之

居寄詩要予樣舟以待其還時聞楊子江潮
不應輟浙右之游將訪親于海陵因賦此告

別癸酉十一月也

君希謝太傅築室卧東山應攜玉人去為問何時還扁
舟欲之東霜落江潮慳難從京口渡且轉廣陵灣與君
合復離恍若愁夢間嬰疾再寒暑醫師憐我頑頽齡未
遽盡解組誓投閒幽岩有芳桂晚節約同攀

留別龜山白禪老兼簡楊居士介 癸酉十一

月癸已朔風下淮晚次龜山白禪老見臨乃
歷陽之舊也因賦此詩以別

汴尾望龜山人烟了可數長淮斷

音鍛

日風浩若千里阻

舟無百石載兩腋憂雙鵞首盪頽波中流幾翔舞維
梢追曛暮坎坎禪林鼓曳錫辱來過依然識眉宇青熒
燈火畔再得親軟語多慙晚聞道忠義夙自許剛腸憤
激際赤手搏豺虎過壯纏百疴餘生托兒乳羸軀假死
緩豈復勝冠組會約子雲孫西岩兩庵主

題海陵開元寺棲雲菴 寺即唐王屋禪師道

場甲戌五月郡守周開祖要予同賦

道人猶浮雲發彼王屋岑朝見膚寸合暮為四海霖造
物一戲耳浮雲本無心永謝應龍召深棲雙樹林蒼生
熱惱地千載仰慈陰皎月示弦晦清風何古今誰舉甘
露頌轟然海潮音支離病居士和以無絃琴

寄題潯陽周氏濂溪草堂 周本江華人名敷

頤字茂叔仕至尚書郎累使嶺表中年投節

退居湓城之南溪上因名瀟溪以自況二子
壽字元翁燾字次元相踵登進士丙子五月
予檣舟漢陽始與元翁相際求予賦此詩

瀟溪之水清未足濯公纓平生抱苦節成就此溪名長
笑置符傳孤雲歸思輕溪頭四壁居溪下百畝耕量汲
奉晨盥課樵共夕烹希逢杖屨游但聽弦歌聲為客剪
三徑傳家通一經雙珠交照乘合璧倍連城被褐有餘
樂問縑無隱情桂林兩枝秀借爾俗眼明昔仰名父子

今推難弟兄不應文範裔遽謂公慙卿如襲帶礪封母
為權利傾地實寢丘比有力安得并勒詩高岸石敢告
後代生

送周壽元翁西上 丙子七月賦予時卧病漢

陽

露草蔓前庭微蟲思明月宵分耿不寐懷我友生別舟
師望箕宿綴幔須明發鷁首托歸風安知川路濶夫君
青雲士行奉紫宸謁一鶚扶塵籠騫軒應霜節仰追鸞

鶴駕官顧狐兔穴越客寓荒城卑棲慕鳩拙哀遲積阨
弊未死人事缺嬾製一緘書寄聲彼朝列方今百廢舉
袞職補何闕每自幸餘齡江湖傲華髮躬耕固難強五
斗代薇蕨摩腹遡南薰蒼生解煩渴

題陶靖節集後 丙子七月寓居漢陽手校陶
集因題其後

淵明不樂仕解組歸柴桑遡風北窗下坦腹傲羲皇儲
粟既屢空乞食何惶惶有身即大患斯語聞伯陽顧我

亦多忤丘樊思退藏慙無辟粒術圭勺耗官倉

補感遇詩 子熙寧元豐間嘗賦感遇十數詩

久忘其藁丙子七月因曝藥紙得此篇半已

裂去不可記因補成之時寓居漢陽

猛虎未出柙擾如搏鼠狸蒼鷹方在韝孱甚伏卵雌弭
戢以違禍孰云爾無知幸遭縱釋仁返謂人可欺豈復
念前辱搖尾垂翅時擇肉斃儕類戕忍猶天安吾將罪
虞者奈何生致之南山有重阻鄧林無樛枝機穽與蘿

爵今也將安施

黃鶴樓 在鄂州使宅之西南隅唐閻伯程記
云圖經載費禕登仙嘗駕黃鶴返憇于此遂
以名樓焉并見于神仙傳述異記按蜀書傳
本江夏鄆人也為刺客郭循所害豈道家所
謂兵解者與丙子九月始登此樓因賦

登真者誰子昔有費公禕白日玉書下青天駕鶴飛此
地少留憇神標悵依依振裾謝塵濁與爾方遠違層樓

寵陳迹江山長四遠登臨美商素雨氣薄西暉水落洲
背嫩風豪帆背肥飄然起遐想琳館閼岩扉明月識悠
闊白雲疑是非金桃未遽熟薤露虞先晞高樹兩華表
長招羽駕歸靈瓢五色劑定與遺民揮自顧非仙質延
生猶可希刀圭儻不恡如飽首陽飢

鸚鵡洲

在鄂州南浦上按圖經云因禰衡賦

鸚鵡于此洲遂得名後黃祖殺衡投尸此洲
下胡曾詩禰衡珠翠逐江流是也丙子九月

賦

鸚鵡隴下鳥能語奇羽毛羅爵巧相致
瑤籠關鑄牢長懷故園樹烟雨落空巢
萬里遷澤國舟與闕勞正平

托物賦健筆不停操千載訪陳躡晴沙
葭莢高珍禽不復見慨想若人豪處士
起河朔英風拔時髦文章儷墳誥俛就
猶詩騷兒女命揚孔奴兵視劉曹姦雄
可奈此東之投楚郊忤俗竟非命惜哉
時不遭非無擇木智天下方滔滔遺幹
泯魚腹浮魂誰復招近結屈平好佩蘭

雜申椒遠慙子胥烈怒氣翻秋濤空餘芳草碧恨血滿
江臯

懷寄周元翁十首 丙子十月江夏賦

周郎假沔官我偶來沔居得閒定相過談笑沉痾祛俄
聞戍樓角曉引吹咿鳴自君居湓城怱怱一夢餘復求
若輩人陶竈搜璫璣誠為天下士豈特江漢無

周郎嗜茗飲偶與吾好同贈行發吾寶紫壁琱雲龍此
實大官物分甘玉堂公我曹百石吏藜藿每不充詩人

盍得嘗可以驕萬鍾願君間一歎十里共清風

周郎塵外人冰甃立寒玉去我千里餘炯炯長在目有
德且有言可采篆縑竹未為造物憐方狗斗筭祿司晨
屬羣雞安事彼鸞鵠聊自況疲駕鹽車不為辱

周郎妙雅道五字可人師許與非不嚴奈何取我詩我
詩如秋蟲徒增長年悲指疵固有望逐臭得無嗤詩鳴
人必窮我窮豈可宜願君勿闕此晚節並經奇

周郎歸濂溪旱燥害嘉穀仰飽百指餘嗷然坐空屋應

書乞米帖得繼朝來粥行陞大夫籍月賜萬錢祿振顯
屬他年盤飧羅海陸毋忘佛子言不食大夫福

周郎西笑時疊寄兩函書情親語懇到骨肉所不如妙
翰騁道放抵突黃與蘇黃癰曳羸筋蘇厚凝脂膚我於
季孟間增少損有餘家雞敢復道儲此橐中珠

周郎走王都馬足塵翻波賀老宦江夏無人驚雀羅出
處躁靜間奈此貧病何平生解指誓晚境勿婆婆迫死
不得休前言食已多尚敢厭閒冷歛為赴火蛾

周郎強仕年藥石甘苦口得無耗天和湯劑禦衰朽空
華與闕色種種竟何有妄愛溫柔鄉蕩然不回首坐令

松桂姿凋脆等蒲柳幸勿易斯言前車鏡湖叟

周郎有史才班馬可並驅紛紛讒諂人畏君筆削誅我
恨接君晚要亦君之徒沈疴積歲月顧此留須臾志我
壙中石賴君文不謏庶乎陵谷變名字見君書

周郎貫江華而復厭湖湘我亦非樂此西歸計茫茫頽
年抱沉痾生理豈得長後期真何時存沒兩相忘懷君

輒賦詩落筆聯十章他年一掩卷為我涕浪浪

題武昌鄭判官直節亭 鄭名深字文通植竹

開亭于官舍東南隅名直節以自況丙子十月落成求詩為賦

開亭榜直節寵爾青琅玕歲晚傲霜雪不同天下寒挺立百丈夫被之古衣冠春華白粉澤正色莫敢干越客與登覽微吟復長歎六鼇方抃戲雲海翻狂瀾儻逢龍伯公何憚翦一竿岐山鳴鳳雛久刷五色翰何以慰朝

飢美實來加飡高材陋時用自持良獨難不願載樂管
伶倫非古官浪遭野王輩三弄為人懽願製殺青簡燦
然漆與丹褒貶約魯史終古垂不刊顧此託根地辱哉
久泥蟠

題潘大臨東軒 潘字豳老隨親官漢陽關公
舍之東軒著書名左史賦詩見寄因答之丁
丑八月江夏賦

陳公少荒誕一室未遽掃事功竟何成老魅死不早潘

郎治寓舍簾禿無遺蚤庭砌時蘭萱未霜除惡草明窗
幕輕素朝日上杲杲烟蔓擢熏爐松腴浮墨沼著書代
魯史百傳見晚藁賊亂久逋誅吾方力窮討不應兩觀
下僅獲少正郊坐可驕素臣俾渠眸子瞭而翁晏退食
筆削日課了伯仲詠南陔餘風颯林杪安知自娛適聊
慰堂上老起居侍杖藜寒燠躬煬澡昏定仰屋眠是中
亦大好

送咸寧陳令完夫移官吳郡 陳字保神丁丑

十月江夏賦

蒿萊東郭居長者車成轍禮經尚往來豈為我輩設臨
分懷出錢津遠舟速發十月雁啼寒滄波洒微雪送君
一樽酒孤飲聊耳熱會取屈平書商聲歌九閼開正到
是郡暘暖張燈節兩地見梅花相思不同折官閒羈絆
闕陳迹得搜閱虎去丘隧空燕驚宮火滅廊傾罷鳴屨
蘭麝香逕絕逮闕故時人唯餘劍池月名城見圖繪丹
墨殊滅裂細與賦新詩長封寄天末老狐守丘志客子

敢忘越未死定歸東柴荆晝常悶右軍領妙語年大不堪別況復魚鳥情飛沉方此訣

和潘幽老漢上屬目 戊寅四月江夏賦

白雲蒙山頭清川山下流芳洲采香女薄暮漾歸舟並
帶雙荷葉逢迎一障羞持情不得語大婦在高樓

慶湖遺老詩集卷四